

晉記卷八

志

蕭山郭倫撰

禮志

夫人受天地之中。函五常之性。有哀樂喜怒之情。聖人制爲吉凶軍賓嘉之禮。以宏宣天理。和協人心。然後彝倫攸敘。萬物咸若。非徒節其驕淫。防其暴亂也。上古不雕不琢。率其自然。質有餘而文不足。逮乎成周。其文大備。禮儀三百。威儀三千。故曰有天地然後有萬物。有萬物然後有男女。有男女然後有夫婦。有夫婦然後有父子。有父子然後有君臣。有君臣然後

有上下。有上下。然後禮義有所錯。禮也者。天之所范。非人之所爲也。王者代天理物。道之以德。齊之以禮。使四海之內。有秩有典。一道同風。禮之用大矣哉。洎周之衰。而文大勝。諸侯僭竊。上下無章。於是孔子自衛反魯。迹三代之典。垂百王之訓。暴秦焚書。禮經殘缺。漢儒掇拾於煨燼之餘。所謂存什一於千百者也。然先王之大經大法。出於人心之所不容已者。究不得泯焉。漢興。叔孫通。曹褒之徒。因時草創。定爲一代之制。而三年之喪。短於孝文。君子慨焉。其自朝廷郊廟。以及里巷。憲章文物。燦然有倫。其所損益。雖與先

王之禮有閒而三綱五常萬世不變安可以隨時之義少之哉。魏時則有王肅高堂隆博通前載三千條之禮十七篇之學各以舊聞增損當世。武皇帝平吳一統意先儀範而秉性仁孝欲復天經地義之常羣臣阻之卒乃深衣布冠降席徹饌蓋未嘗不太息於杜預之曲說也。江左中興遺文舊典不斷如髮穆哀之後王猷漸替矣。然始則有荀顗鄭沖羊祜任愷參考古今成百六十五篇奏之太康付尚書郎摯虞討論號爲新禮。所陳惟明堂五帝二社六宗及吉凶王公制度凡十五篇。後則有荀崧刁協王彪之更定儀

度其一代之典章。可考而知也。爰紀其事。使後之議禮者有所折衷焉。

周官五禮。吉凶軍賓嘉。而吉禮之大。莫過祭祀。而帝王之祀。莫大於天地祖宗。魏咸熙二年十二月甲子。持節侍中太保鄭沖。兼太尉司隸校尉李熹。奉皇帝璽綬策書禪位於晉。丙寅。武皇帝設壇塲於南郊。柴燎告類于上帝。是時尙未有祖配。泰始二年正月。詔議郊祀配以祖考。時羣臣又議五帝卽天地王氣。時異故殊其號。雖名有五。其實一神。明堂南郊宜除五帝之坐。五郊改五精之號。皆同稱昊天上帝。各設一

坐而已。地郊又除先后配祀。帝悉從之。二月丁丑，郊祀宣皇帝以配天。宗祀文皇帝於明堂以配上帝。十一月，有司又議奏古者丘郊不異，宜并園丘方丘於南北郊，更修立壇兆。其二至之祀合於二郊。是月庚寅冬至，帝親祀園丘於南郊。自後園丘方澤不別立。太康三年正月，帝親郊祀。皇太子皇子悉侍祠。十年十月，又復明堂及南郊五帝位。愍帝都長安，未及立郊廟。元帝渡江，太興二年，始議立郊祀，遂立南郊於巳地。三月辛卯，帝親郊祀。尙未立北壇，地祇衆神共在天郊。明帝太寧三年七月，始詔立北郊，未及建而

帝崩及成帝咸和八年正月追述前旨立於覆舟山
南天郊則五帝之佐日月五星二十八宿文昌北斗
三台司命軒轅后土太一天一太微勾陳北極雨師
雷電司空風伯老人凡六十二神地郊則五嶽四望
四海四瀆五湖五帝之佐沂山嶽山白山霍山醫無
閭山蔣山松江會稽山錢唐江先農凡四十四神是
月辛未祀北郊始以宣穆張皇后配地康帝建元元
年正月辛未南郊辛巳北郊帝皆親奉其復祀五帝
也摯虞以爲昔在上古生爲明王沒則配五行故太
昊配木神農配火少昊配金顓頊配水黃帝配土此

五帝者配天之神。同兆之於四郊。報之於明堂。或以爲五精之帝。佐天育物者也。故旣除而復焉。其郊廟牲幣璧玉之色。秦世多以騊駼。漢但云犢。未辨其色。江左南北郊同用元牡。明堂廟社同以赤牲。禮春分祀朝日於東。秋分祀夕月於西。晉興亦如之。帝皆親祀。

漢儀太史每歲上其年歷。先立春立夏大暑立秋立冬。嘗讀五時令。皇帝所服各隨五時之色。帝升御坐。尙書令以下就席位。尙書三公郎以令置案上。奉以入。就席伏讀訖。賜酒一卮。魏氏常行其禮。晉受命亦

如之。武皇帝以秋夏盛暑常闕不讀令。春冬不廢也。
成帝咸和五年六月丁未。有司奏讀秋令。以服章多
闕。光祿大夫華恒議弗讀。六年三月有司奏讀夏令。
從之。

禮。孟春之月。乃擇元辰。天子親帥三公九卿諸侯大
夫躬耕帝藉。至秦滅學。其禮久廢。漢文帝後始行斯
典。武帝泰始四年。有司奏耕祠先農。可令有司行事。
詔曰。夫國之大事。在祀與農。是以古之帝王躬耕帝
藉。以供郊廟之粢盛。且以訓化天下。近世以來。耕藉
止於數步之中。空有慕古之名。曾無供祀訓農之實。

而有百官車徒之費。今修千畝之制。當與羣公卿士躬稼穡之艱難。以率先天下。主者詳具其制。下河南處田地於東郊之南。洛水之北。若無官田。隨宜便換。而不得侵人也。於是乘輿御木輅以耕。以太牢祀先農。惠帝以後廢不行。

周禮王后帥內外命婦。享先蠶於北郊。漢儀皇后親桑東郊苑中蠶室。祭蠶神曰苑窳婦人。寓氏公主祠用少牢。武帝太康六年。詔曰。昔天子親藉以供粢盛。后夫人躬蠶以備祭服。所以聿遵孝敬。明教示訓也。今藉田有制。而蠶禮不修。由中間務多。未暇崇備。今

天下無事。宜修禮以示四海。其詳依古典及近代故事。以參今宜。明年施行。於是蠶於西郊。使侍中成粲草定其儀。先蠶壇高一丈。方二丈。爲四出陛。陛廣五尺。在採桑壇東南。帷宮外門之外。而東南去帷宮十丈。在蠶室西南。桑林在其東。取列侯妻六人爲蠶母。蠶將生。擇吉日。皇后著十二笄步搖衣青衣。乘油畫雲母安車。駕六驪馬。女尚書著貂蟬。佩璽陪乘。載筐鉤。公主三夫人九嬪世婦諸太妃太夫人及縣鄉君郡公侯特進夫人外世婦命婦皆步搖衣青。各載筐鉤。從蠶。先桑二日。蠶宮生蠶著薄上。桑日。皇后未到。

太祝令質明以一太牢告祠。謁者一人監祠。祠畢徹饌。班餘胙於從。桑及奉祠者。皇后至西郊升壇。公主以下陪列壇東。皇后東面躬桑。採三條。諸妃公主各採五條。縣鄉君以下各採九條。悉以桑授蠶母。還蠶室。事訖。皇后還便坐。公主以下乃就位設饗宴。賜絹各有差。

前漢但置官社而無官稷。故漢魏太社有稷而官社無稷。常二社一稷。晉興一如魏制。元帝建武元年依洛京立二社一稷。其太社之祝曰。地德普施。惠存無疆。乃建太社。保祐萬邦。悠悠四海。咸賴嘉祥。其帝社

之祝曰。坤德厚載。邦畿是保。乃建帝社。以神地道。明社惟辰。景福來造。

漢儀。每月旦。太史上其月歷。日有變。割羊以祠社。自晉受命。日月將交會。太史乃上合朔。尚書先事三日。宣攝內外。戒嚴。摯虞決疑曰。凡救日食者。著赤幘。以助陽也。日將蝕。天子素服。避正殿。內外嚴警。太史登靈臺伺候。日變。便伐鼓於門。聞鼓音。侍臣皆著赤幘。帶劍入侍。三臺令史以上。皆各持劍立其戶前。衛尉卿驅馳繞宮。伺察守備。周而復始。亦伐鼓於社。用周禮也。又以赤絲爲繩。以繫社。祝史陳辭。以責之。勾龍

之神。天子之上公也。故陳辭以責之。日復常乃已。咸寧三年四年。竝以正旦合朔。卻元會。康帝建元元年。太史上元日合朔。亦如之。

尙書禋於六宗。諸儒互說不同。及晉受命。司馬彪等表六宗之祠不應特立。於是遂罷。後摯虞奏引魏散騎常侍劉邵以爲萬物負陰而抱陽。冲氣以爲和。六宗者太極冲和之氣。爲六氣之宗者也。虞書謂之六宗。周書謂之天宗。漢魏相仍。著爲貴神。遂祀如舊。左傳龍見而雩。漢儀歲旱郡縣各掃除社稷。公卿官長以次行雩禮。求雨。閉諸陽。衣皂。興土龍。立土人。舞。

僮二侑。七日一變如故事。武帝咸寧二年春分久旱。四月丁巳詔曰。諸旱處廣加祈請。五月庚午始祈雨於社稷山川。六月戊子獲澍雨。此雩之舊典也。太康三年四月十年二月又如之。其雨多則禋祭。赤幘朱衣。閉諸陰。朱索縈社。伐朱鼓焉。

昔武王入殷。未及下車而封先代之後。蓋追思其德也。孔子以大聖而終於陪臣。未有封爵。至漢元帝。孔霸以帝師。賜爵號褒成君。奉孔子後。魏黃初中。以議郎孔羨爲宗聖侯。邑百戶。奉孔子祀。令魯郡修舊廟。置百戶吏卒以守衛之。及武帝泰始三年十一月。改

宗聖侯孔震爲奉聖亭侯。又詔太學及魯國四時備三牲以祀孔子。明帝太寧三年詔給奉聖亭侯孔亭四時祠孔子祭宜如泰始故事。

禮始立學必先釋奠於先聖先師。及行事必用幣。漢世雖立學而斯禮無聞。魏正始中帝講論語尙書禮記通竝使太常釋奠以太牢祠孔子於辟雍。以顏回配武帝泰始咸寧太康中皇太子每講一經通太子竝親釋奠以太牢祀孔子以顏回配。惠帝元康三年元帝太興二年皇太子講經通亦如之。成穆孝武經通竝釋奠如故事。而穆帝孝武則權以中堂爲太學。

故事祀臯陶於廷尉寺。新禮移祀於律署。以同祭先聖於太學也。故事祭以仲春。新禮以孟秋。摯虞以爲按虞書臯陶作士。惟明克允。功在斷獄之成。不在律令之始也。太學之設。義重太常。故祭於太學。是崇聖而從重也。律署之置。卑於廷尉。移祀於署。是去重而就輕也。又祭用仲春。義取重生。改用孟秋。以應刑殺。理未足以相易。宜皆如舊。從之。

歲旦常設葦茱桃梗磔雞於宮及百寺之門。以禳惡氣。

魏青龍元年詔郡國山川不在祀典勿立祠。武帝泰

始元年十二月詔曰昔聖帝明王修五嶽四瀆名山
川澤各有定制所以報陰陽之功也然以道莅天下
者其鬼不神其神不傷人故祝史薦而無媿辭是以
其人敬慎幽冥而淫祀不作末世信道不篤僭禮瀆
神縱欲祈請曾不敬而遠之徒偷以求幸祇妄相煽
舍正爲邪故魏朝疾之其按舊禮具爲之制使功著
於人者必有其報而祇淫之鬼不亂其閒二年正月
有司奏春分祠厲殃及禳祠詔曰不在祀典除之
王制天子七廟諸侯以下各有等差禮文詳矣武帝
泰始元年十二月丙寅受魏禪丁卯追尊皇祖宣王